

**Naalakkersuisut juli 2022 naatinnagu nunatta kangiani innuttaasunut inuussutissarsiornikkut inerisaanermut ineriartortitsinermullu paasititsiniaanissamik pikkorissaanertaqartumillu pilersaarusiamik saqqummiusseqqullugit peqquneqarnissaanik Inatsisartut aalajangiiffigisassatut siunnersuut**  
Inatsisartuni ilaasortaq, Lars Poulsen, Siumut.

### **Akissutissatut allakkiaq**

Inuussutissarsiornermut Niuernermullu Naalakkersuisoq

### **Siullermeerneqarnera**

Naalakkersuisut sinnerlugit Inatsisartuni ilaasortaq, Lars Poulsen, Siumumeersoq aalajangiiffigisassatut siunnersuuteqarneranut qujaffigaara.

Sammissaq pingaaruteqartorujussuuvoq, tamaattumik Naalakkersuisut naalakkersuisooqatigiinnissamat isumaqatigiissuteqarnermikkut Kalaallit Nunaanni inuussutissarsiorfiit inerisarneqarnissaanik pisariaqartitsisoqarnera eqqaasimavaat. Kalaallit Nunaata kangia covid-19-ip ajornartoortitsinerata nalaanni matoqqanerpaat ilagisimavaat, naak Kalaallit Nunaata kangiani inuussutissarsiorfiit nalimmassarsinnaassuseqarnertik takutissimagaluarlugu mattussisoqarnerata kingunerisaanik inuussutissarsiorfiit kaalluarneqarsimapput. Qujanartumik inuussutissarsiutinik ingerlatsilluartut arlaqarput periarfissallu amerlaqaat.

Naalakkersuisuni kissaatigaarput Kalaallit Nunaata kangiani suliffeqarfiit ineriartortinneqarnissaat kiisalu isumaginninnikkut inissisimaffiup pitsanngorsarneqarnissaa. Inuussutissarsiorfinnik siuarsaaneq pingaarutilittut inissisimavoq, taamaattumik Naalakkersuisut kissaatigaat Kommuneqarfik Sermersooq suleqatigalugu misissussallugu Kalaallit Nunaata kangiani suut inuussutissarsiorfittut periarfissaanersut kiisalu suliffinni inerisaanermi suut periarfissaanersut. Naalakkersuisut pikkorissaatitsinerit inuiaqatigiinnut pingaarutilittut isigaat, tassuunami sulisinnaassuseq sulisinnaasullu amerliartortinneqassammata tamassumalu aamma kingunerissavaa inuiaqatigiinni isumaginninnikkut pitsaanagerusumik inissisimaneq.

Qulaani taakkartorneqartut tunngavigalugit Naalakkersuisut aalajangiiffigisassatut siunnersuutip ima allanngortinneqarnissaa inassutigaat:

*Naalakkersuisut juli 2022 naatinnagu nunatta kangiani innuttaasunut paasititsiniaanissamik pikkorissaanertaqartumillu pilersaarusiamik saqqummiusseqquneqarnissaanik aalajangiiffigisassatut siunnersuut. Suliaq maannamut isumaginninnikkut suliffeqarnerullu iluani ineriartortitsinernut ingerlanneqareersunut tapitartuutaassaaq.*